

Song Mehlwg Ndaw Hagdangz

学校里的一对母女

□ Banh Cuhlenz / 班珠莲

Bi' gvaq seizcou haggeiz moq hainduj, ndaw hagdangz it nienzgaep miz dah hagseng naengh youq gwnz eijloek ndeu, nyoengx aen eijloek dwg boux mehmbwk ndaej samcib geij bi ndeu, yawj ndaej ok dwg daxmeh boux hagseng. Moix ngoenz banhaet, daxmeh hai denceh soengq de daengz hagdangz, yienzhaeuh umj de hwnjdaeu, menhmenh cuengq daengz gwnz eijloek bae, gaex gvaq cauhsangz gvangqlangh, byaij haeu ndaw gyausiz bae, youq aen daizsaw doeklaeng ndeu, youh daj eijloek umj de cuengq youq gwnz daengqej, baij ndei gij saw de aeu yungh, aeu cag cug ndei gij ga mbouj ndaej byaij de, guh sat gijneix, cij lizhai gyausiz, youq rog ra aen gungx deq dawz. Roengzdangz le youh aeu umj de bae diengzhaex. Mboujguen mbwnrongh roxnaeuz mbwnraemh, mboujguen seizndat seiznit, cungj dwg yienghneix.

Dah hagseng neix yawj hwnjdaeu beij doengzban doengzhag hung sang haujai, doeklaeng ndaej rox nienzgeij de wnggai doeg sam nienzgaep lo, hoeng aenvih ndangdaej miz bingh, mbouj miz saek aen youwzyenz nyienh sou de. Gvaq le geij bi, dauqdaej miz aen youwzyenz ndeu nyienh sou de lo, hoeng ngaenzsaw cix aeu beij bouxwnq lai haujai. Caemhcai aenvih dah hagseng neix mbouj ndaej gag goq bonjfaenh, daxmeh de hix cijndaej ngoenzngoengz youq hagdangz buenx de ciuqgoq de, mbouj ndaej okbae guhhong, ndawranz souhaeu couh baengh boh de boux vunz ndeu, gij

saedceij ranz de gvaq ndaej engqgya hoj lo. Ndigah de youq ndaw youwzyenz doeg le sam bi le, couh daj ndawsingz dauqma daengz lajmbanj doeg siujyoz lo, yienghneix ngaenzsaw mbouj bae baenzlai. Gyoengq lingjauj caeuq lauxsae ndaw hagdangz raen song mehlwg hojlien, couh youq hagdangz anbaiz faenh hong ndeu hawj daxmeh de, moix ngoenz cawj haeux byaek hawj gyoengq lauxsae, yienghneix ndaej hawj ndawranz demgya di souhaeu, youh ndaej seizseiz ciuqgoq de. Daxmeh de gyo'mbaiq lingjauj hagdangz dangqmaz, cawj haeux byaek gig haeujsim, ciengzseiz swnhfwngz guh gij saeh wng dem, gaenx fwngz gaenx ga raixcaix.

Bi ndeu daeu, dah hagseng neix couhdwg yienghneix, moix ngoenz deng cug youq gwnz gadaiz, ndangdaej byongh bomz youq gwnz daizsaw, cengqgengz cengjdaeux fwngz gyauej, gaem maenh ganjbit, dwgrengz youq gwnz gobwnj geiq bitgeiq, raiz cozyez. Hoeng, baenzneix hoj guh, de vanzlij genhciz nyinhcaen hwnjdangz, mbouj lauqgvaq. Mboujguen cozyez miz geijlai, de cungj ciuqseiz guh liux.

Bi ndeu gvaqbae lo, de hwnj ngeih nienzgaep lo, gyausiz de hix daj caengz daih'it buen daengz caengz daihngaih lo. Ndang de maj miz di noh lo, daxmeh de cix aeu aemq de lai benz caengz laeuz ndeu. Gij ciengzmienh gamjdoengh vunz neix moix ngoenz dou cungj ndaej yawjraen, gig gamjdoengh, baenzlawz nanz baenzlawz hoj hix aeu soengq

dahlwg hwnjdangz, mboujguen de hag ndaej geijlai, rox geijlai doxgaiq, mboujguen doeklaeng de ndaej mbouj ndaej baengh gij doxgaiq de hag ra ndaej faenh hong ciengx bak. Dah hagseng neix caen hojlien, ndangcanz mbouj ndaej lumj lwgnyez wng yienghde buet bae buet dauq diuq hwnj diuq roengz guhcaemz, hoeng, de caen vuenyungz, miz bohme baenzneix gyaex de, caenh gij rengz bonjfaenh soengq de bae hagdangz doegsaw, mbouj bwed mbouj vut de gvaq. Gyoengqde lumj go'nywj geh ndawrin nei, roengzrengz bae did nyaz, bae majhung, youq benq rin fwzyauyau yienh ok gij heu bonjfaenh.

Mizseiz gag ngeix, lauheiq lauxsae hawj dou raiz haujai saw seiz simnyap, lauheiq diyyuz lauxsae heuh dou youq cauhsangz buet dou cix cungj naeuz buet mbouj ndaej, lauheiq seizndat dou mbouj nyienh

bae hagdangz..... Gijneix doiq dou daeu gangj, cungj dwg saeh iq saeh bingzciengz, hoeng doiq dah hagseng neix daeu gangj, gij saeh neix ciuh vunz de cungj hoj guh roxnaeuz guh mbouj ndaej gvaq, danghnaeuz gig vei guh saek gienh saeh de cungj roxnyinh vuenyungz lo. Hoeng de moix ngoenz souh baenzlai nyoengnyamx caeuq haemzhoj hix riu gvaq ndwenngoengz, caenhrengz lix roengzbae, caen hawj vunz boiqfug!

Daih lai vunz gvaq ngoenz suenq ngoenz, sai ngaenz sai rengz bae guhcaemz, maz cungj mbouj guh, maz cungj mbouj hag, caen dwg begbeg uengjfeiq seizgan. Caen aeu lumj song mehlwg yienghde, najdoiq gumzgamx mbouj nyinh saw, roengzrengz cengjdaeux. Caemhcai moix ngoenz cungj baenzneix gyaunde, maqmuengh caezgya cungj insik, mbouj simnyap mbouj simfan, nyinhcaen gvaq, angqyangz gvaq!



Mbwn lamz fwj hau gomiuz heu.

Vangz Yinz ingi

• Sawcuenhraz Lwngnyez •

Gij Golwngnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

Ah Veij hemqgdgwd, raemxda rim naj, lumj youq gij haemzhoj ndawde cakdai. Meh de ceng mbouj geijlai gvi youq gwnz namh, dawz lwgfwngz Ah Veij cuengq youq ndawbak roengzrengz sup, gwnz najbyak hix conh ok gij hanh naed dem naed, nyaeb byoem hung he cungj gyuek youq najbyak, henzgemj mbouj rox venj hanh roxnaeuz raemxda, gou cij raen naed lien naed doek roengzdaeu.

Gou sim' in raixcaix, gij cingzingj neix lumj youq gyawz raen gvaq, gij in' get Ah Veij caeuq gij simgaenj daxmeh de, gou lumj roxnyinh ndaej cingcing cujcu, cungj roxnyinh neix hawj gou doeksaet youh ndeilau, mbouj nyaenxsim caiq cimyawj gwnznaj raemxda rimrad mehlwg Ah Veij, baez cienq gyauej, raen Ah Gunh cingq nyenghnyengh ndwn youq henzndang gou.

"Deng duzngwz maz haeb?" Gou sing daemq cam de.

"Gou hix mbouj rox." Ah Gunh yung mbaq baez ndeu.

"Mwngz mbouj dwg caeuq de doxyouq gip maknganx ha?" Gou ca mbouj geijlai hemq hwnjdaeu lo.

"Gou cij ndaejnyi de 'ai' sing ndeu, ndwn youq laj gofaex gwq bi fwngz."

"Mbouj ndaej raen duzngwz?"

"Ndaej raen, hoeng mwhde gou hix lau ndaej nyengh lo."

"Duzngwz yienghlawz?"

"Ndaemndutndut, mongmwtmw, raezrangrang....."

"Miz geijlai raez?"

Ah Gunh mbehai song fwngz baez ndeu, aiq miz song cik raez.

"Mwngz caen huk, vihmaz seizde

mbouj bang Ah Veij sup lweddoeg okdaeu ne?"

"Gou mbouj gamj."

Gou yiemjiemj haibak sinz vahsoemj ndaq de lo, "ndaek ced vunz mwngz, mbeiq lai lo!"

"Gou aeu saivag cug lwgfwngz de hwnjdaeu." Ah Gunh doq bouj gangj coenz he, caemhcai nyengq ndang coh henz, lumj lau gou yaek cuk de gaemxgienz he.

Dahraix, danghnaeuz mbouj dwg youq ndawranz Ah Veij, gou doq cuk aek de gaemxgienz he.

"Meh, ndei lo! Meh, in dai gou lo....."

Gij sing Ah Veij heuh yinx gou cienq naj bae yawj de.

Daxmeh de mbouj oksing, lumj vunzfaex nei, roengzrengz cadawz fwngz Ah Veij, cuengq youq ndawbak sup lweddoeg biq ok.

Gou caeuq Ah Gunh haj roek boux lwgnyez humx youq seiqhenz, caezgya cungj gig naekcaem, hoeng byawz hix siengj mbouj ok miz maz fap ndei bae bang Ah Veij.

Bakdou miz saek raq sing yamqdin, gou baenq gyauej baez yawj, dwg Ah Cang caeuq Ah Giuh cung haeujdaeu lo.

"Hi——"

(caengz sat)